



GASTEIZKO UDALAREN HIRI BARATZEEN ERABILERA ARAUTZEKO ORDENANTZA

ZIOEN ADIERAZPENA

Nekazaritza- eta abeltzaintza-jarduerak berebiziko garrantzia du Gasteizko udalerrian, bai ikuspegi sozioekonomikotik, bai natur espazioa eratzen duen elementu gisa. Arabako Lautadan dago udalerrria, eta azaleraren ia heren bat nekazaritzarako baliatzen da; izan ere, landa-eremuko biztanle ugari jarduera horretan aritu ohi dira, modu profesionalean. Nolanahi ere, Arabako Lautadako eta Gasteizko udalerriko nekazaritza-tradizioa lehen mailako nortasun-elementua da gure lurraldean.

Errealitate horrek landa-eremua gainditu du, eta hiriko kaleetara iritsi da, gero eta jarduera erakargarriagoa baita hiri-nekazaritza bertako biztanleentzat. Egunez egun, barazkiak, loreak edo baso jangarriak landatzeko lursailak eskatzen dituzte gero eta pertsona eta elkarte gehiagok.

Joan den mendeko 90eko hamarkadaren bukaeran, Eraztun Berdeko baratzeak sortu zituen Udalak, baratzezaintza ekologikorako ekipamendu gisa sortu ere, aisialdia, prestakuntza eta ingurumen-hezkuntza batu ahal izango ziren espazioak izan zitezen, marko arautu batean —lursailen okupazioari eta horiek lantzeko baliatuko ziren teknikei zegokienez—. Garai hartan baziren baratzeak ibaiertzetan eta hiriaren periferiako beste leku batzuetan, baina modu desordenatuan eta lurzorua era irregularrean okupatuz lantzen ziren, eta hori arautu nahi izan zen ekipamendu horiek sortu zirelarik.

Mende honetako bigarren hamarkadan, ugaritzen ari dira erabiltzen ez diren hiri-lursailak okupatu eta bertan baratzea landu ahal izateko herritarrek egiten dituzten eskariak. Eskari horiei erantzuteko asmoz, hiri-baratzeak sortu ditu Udalak ekipamendu-lursail libreetan, lursail horiei erabilera iragankor bat emanaz, harik eta behin betiko okupatzen diren arte. Herritar-elkarteak ari dira baratze horiek kudeatzen, modu autonomoan, helburutzat harturik gasteiztarren artean agroekologia eta baratzezaintza ekologikoa sustatzea —elikagai osasungarrien iturri gisa, aisialdi aktiborako aukera gisa, eta nekazaritza eta landa-bizimodua ezagutzeko modu gisa—. Gainera, auzotarrak elkartzeko eta garapen komunitariorako espazioak sustatzen dira, eta, hartara, elkarlana, auzolanaren filosofia, pertsonen arteko harremanak eta auzokoen kohesio soziala bultzatzen.

Gasteiztarrak nekazaritza ekologikora hurbiltzeko eta elikagaiak ekoitzi eta kontsumitzeko zirkuitu laburrak sustatzeko apustua Gasteizko nekazaritzako elikagaien estrategiaren testuinguruan egiten da, Udalak konpromisoa hartu baitu bertako elikagaien eta elikagai ekologikoen ekoizpena eta kontsumoa bultzatzeko.



Ordenantza honek, zein Toki Araubidearen Oinarriak arautzen dituen apirilaren 2ko 7/1985 Legearen 4.1 a) artikuluan eta Euskadiko Toki Erakundeei buruzko apirilaren 7ko 2/2016 Legearen 5. artikuluan toki-erakundeei aitortzen zaien erregelamenduak egiteko eta beren burua antolatzeke ahalaren fruitu baita, euskarri juridikoa eman nahi die Udalaren hiri-baratzeen erabilerari eta gozamenari.

Udalaren hiri-baratzeen erabilerari aplikatuko zaion erregimena ezartzen du ordenantzak, bertan arautzen baitira udal-titulartasuneko baratzezaintza- eta frutagintza-espazioen erabilera eta gozamena, erabiltzaile izango diren pertsona eta kolektiboak hautatzeko prozedura eta horien eskubide eta betebeharrak.

Administrazio Publikoen Administrazio Prozedura Erkidearen urriaren 1eko 39/2015 Legearen 129. artikuluan jasota dauden erregulazio onaren printzipioei erantzuten die ordenantzak.

Horrela, bada, premia-printzipioaren ildotik, interes orokorreko arrazoiek justifikatzen dute araua, aurreko paragrafoetan azaldu bezala; izan ere, udal-baratzeak erabili nahi dituzten pertsona guztien eguneroko eremuari eragiten dio, eta izaera arautzaileko xedapen baten bitartez baino ezin da lortu hori.

Bestalde, efikazia-printzipioaren ildotik, gorago adierazi diren helburuak lortu nahi dira arauaren bitartez.

Proporzionaltasun-printzipioaren ildotik, Udalaren hiri-baratzeen erabilera arrazionala bermatzeko ezinbestekoa den erregulazioa biltzen du ordenantzak.

Segurtasun juridikoaren printzipioa aintzat harturik, udal-eskumenen esparrura mugatzen da ordenantza, eta bertan garatzen, eta arau-esparru egonkorra sortzen du, iragartzeko modukoa, integratua eta argia, zeinek ziurtasuna ematen baitu, eta inplikaturako pertsona guztiek ezagutu eta uler dezatela ahalbidetzen.

Aldi berean, Udalaren hiri-baratzeak erabiltzeko marko malgua eratzen du. Era berean, efizientzia-printzipioari erantzuten dio ordenantzak, beharrezko ez diren administrazio-kargak, pertsonentzat baztergarriak direnak, ekiditen dituelarik, eta baliabide publikoen kudeaketa sinplifikatu eta arrazionalizatzen.



Azkenik, gardentasun-printzipioren ildotik, urriaren 1eko 39/2015 Legearen 133. artikuluan herritarrek lege-mailako arauak eta erregelamenduak egiteko prozeduran, hots, izaera arautzaileko xedapenen tramitazioan parte hartzeko aurreikusitako bidea baliatu da; zehazki, kontsulta publikoaren tramitea, Gasteizko Udalaren webgunearen bitartez.

AURKIBIDE SISTEMATIKOA

I. titulua.- Arau orokorrak.

1. artikulua.- Ordenantzaren xedea.
2. artikulua.- Kontzeptua, tipologia eta aplikazio-eremua.
3. artikulua.- Udalaren hiri-baratzeen helburuak.
4. artikulua.- Printzipio orokorrak.
5. artikulua.- Erregimen juridikoa.
6. artikulua.- Tasa.

II. titulua.- Pertsona eta entitate onuradunak hautatzeko prozedura.

7. artikulua.- Erabiltzeko baimenak.
8. artikulua.- Onuradun izateko betekizunak.
9. artikulua.- Baimena eskuratzeko debekuak.
10. artikulua.- Baimena eskuratzeko prozedura.
11. artikulua.- Baimenen iraunaldia.
12. artikulua.- Baimenen iraungipena.

III. titulua.- Erabilera- eta gozamen-baldintzak.

13. artikulua.- Baimenen izaera pertsonala.
14. artikulua.- Erabilera-arauak.
15. artikulua.- Debekuak.



- 16. artikulua.- Ordutegiak.
- 17. artikulua.- Hondakinen kudeaketa.
- 18. artikulua.- Erabiltzaile-izaera galtzea.

IV. titulua.- Erantzukizun-erregimena.

- 19. artikulua.- Erantzukizun-erregimena.
- 20. artikulua.- Kalteak eta galerak ordaintzea.

V. titulua.- Udalaren hiri-baratzeen antolaketa.

- 21. artikulua.- Baratzeen kudeaketari atxikitako organoak eta langileak.
- 22. artikulua.- Jarraipen-batzorde teknikoa.
- 23. artikulua.- Teknikariak.
- 24. artikulua.- Erabiltzaile diren pertsona eta entitateekiko komunikazioak.

VI. titulua.- Diziplina-erregimena.

- 25. artikulua.- Ikuskapena eta kontrola.
- 26. artikulua.- Legezketasuna babestea.
- 27. artikulua.- Arau-hausteak eta zigorrak.
- 28. artikulua. Arau-hausteak.
- 29. artikulua.- Zigorrak.
- 30. artikulua.- Zigortzeko eskumena.
- 31. artikulua.- Prozedura zigortzailea.
- 32. artikulua.- Kautela-neurriak.
- 33. artikulua.- Lehengoan uzteko eta konpontzeko obligazioa.
- 34. artikulua.- Bateratasuna auzibide penolarekin.



XEDAPEN GEHIGARRIA

XEDAPEN IRAGANKORRA

AZKEN XEDAPENA

I. titulua.- Arau orokorrak.

1. artikulua.- Ordenantzaren xedea.

Hauxe da ordenantza honen xedea:

- 1- Udalaren hiri-baratzeen funtzionamendu-arauak ezartzea, horiek erabili eta baliatzeko baldintzak arautuz, baita onuradun izango diren pertsona eta entitateak hautatzeko prozedura ere.
- 2- Aldi berean, diziplina-erregimenaren arauak ematen dira, eta arau-haustek eta horien ondorioz baratzeak erabiltzen dituzten pertsona eta entitateei jarri ahal izango zaizkien zigorrak zehazten.

2. artikulua.- Kontzeptua, tipologia eta aplikazio-eremua.

- 1.- Udal-titulartasuneko ekipamenduak dira Udalaren hiri-baratzeak, baratze zaintza ekologikoko jarduerak —irabazi-asmorik gabe— garatzera bideratuak.

Bi ekipamendu mota bereizten dira:

- a) Udalak edo berorren erakunde instrumentalek zuzenean kudeatzen dituzten udal-baratzeak, lursailak lagatzera bideratuak —baratze tarako erabil daitezkeen lurzatatitza ulertzen direlarik—, pertsona fisikoen edo irabazi-asmorik gabeko elkarteen aldeko erabilera-baimenaren erregimenean.
- b) Herritar-entitateek kudeatzen dituzten udal-baratzeak —aldez aurretik lizitazioa eginda, eta kudeaketa-proiektuak aurkezten dituztelarik—.

- 2.- Lizitazioaren baldintza-agirietan eta adjudikatutako kudeaketa-proiektuan finkatutako funtzionamendu-arauak arautuko dituzte azken horiek, printzipio orokorre



eta izaera zibikoko jokabide-arauei dagokienez ordenantza hau aplikatuko bada ere, modu osagarrian.

3. artikulua.- Udalaren hiri-baratzeen helburuak.

Helburu hauek dituzte Udalaren hiri-baratzeek:

- 1.- Hiri-espazioak erabilera publikorako berreskuratzea, udalerriko paisaiara aniztasuna ekarriz.
- 2.- Pertsonen aisialdirako espazio bat eskaintzea.
- 3.- Herritarren partaidetza sustatzea.
- 4.- Bioaniztasun-espazioak sortzea.
- 5.- Ingurumenari begirunea dioten laborantza-jokabideak sustatzea: hondakinak kudeatzea, ura aurrezte, nekazaritza ekologikoa, tradiziozko nekazaritzako erabilera eta ohiturak berreskuratzea eta abar.
- 6.- Baratzeen izaera hezitzailea eta ludikoa sustatzea.
- 7.- Inguru naturalaren eta giza jardueren arteko harremanak ezarri eta baloratzea.
- 8.- Elikadura osasungarria eta elikadura-ohitura osasungarriago eta iraunkorragoak sustatzea.
- 9.- Ingurumenaren ezagutza hobetu eta harekiko begirunea bultzatzea.
- 10.- Belaunaldien eta kulturen arteko harremanak eta trukea sustatzea.
- 11.- Elkarte-ehunaren jarduera sustatzea.
- 12.- Auzotarrak elkartzeko eta sozializatzeko espazioak sustatzea, baita erantzunkidetasuna eta ekimen soziala eta auzotarrena ere, bereziki auzoetan sustatzen diren baratzeetan.
- 13.- Bertako produktuen eta produktu ekologikoen ekoizpena eta kontsumoa bultzatzea, eta nekazaritzako elikagaien udal-estrategian aurrera egitea.

4. artikulua.- Printzipio orokorrak.

Printzipio orokor hauek arautuko dituzte Udalaren hiri-baratzeak:



a) Onik zaindu eta mantentzearen printzipioa, esan nahi baita erabiltzaile diren pertsona eta entitateek oro beren gain hartu beharko dutela erabiltzeko uzten zaizkien instalazioak onik zaindu eta mantentzearen ardura, eta behar den arreta jarri beharko dutela horretan.

b) Elkarrekiko errespetuaren printzipioa: erabiltzaileek ekidin egin beharko dute gainerako lursailen erabiltzaileei enbarazu edo kalterik egitea.

c) Ez merkaturatzearen printzipioa: debekatuta egongo da baratzeetan lortzen diren produktuak merkaturatzea; norberak edo familiak kontsumitzeko izango dira.

d) Ingurumen-prebentzioaren printzipioa: ezingo da erabili Euskadiko Nekazaritza eta Elikadura Ekologikoaren Kontseiluak (ENEEK) baimendu gabeko ongari edo produktu fitosanitariorik.

e) Integrazioaren, sozializazioaren eta gizarte-kohesioaren printzipioa.

Hiri-baratzeek balio sozial garrantzitsua dute bertan parte hartzen dutenentzat, denbora betetzeko aukera ematen baitiete, harreman berriak egitea ahalbidetzen eta, osasunerako on den jarduera fisikoaren bitartez, bizi-kalitatea hobetzen laguntzen. Orobat du balio handia hiriarentzat, ingurumenaren ikuspuntutik, berdegune publiko berriak bihurtzen baitira, baratzea protagonista, eta lurrarekiko kontaktua ahalbidetzen baitute.

Dibertsitate funtzionala duten pertsonentzat egokitutako zenbait baratze gorde ahal izango ditu udalak. Eskaririk ez badago, baratze horiek kupo orokorrera pasako dira.

f) Hiriko aktibismo sozialaren printzipioa.

Eremu publikoetan sustatzen direlarik, elkarte-mugimendua, kultura eta partaidetza publikoa ere bultzatzen dira.

g) Kontsumo arduratsuaren, zirkuitu laburren, nekazaritza iraunkorraren eta ingurumenaren inguruko sentsibilizazioaren sustapenaren printzipioa.

5. artikulua.- Erregimen juridikoa.

1.- Jabari publikoko ondasunen erabilera komun berezitzat jotzen da Udalaren hiri-baratzeen erabilera, eta aldez aurretik administrazio-baimena eskuratzea eskatzen du, hauetan ezarritakoaren ildotik:

a) 33/2003 Legea, azaroaren 3koa, Administrazio Publikoen Ondareari buruzkoa, edo ordeztan duen araudia.



b) 1372/1986 Errege Dekretua, ekainaren 30ekoa, zeinen bitartez Toki Erakundeen Ondasunen Araudia onetsi baitzen.

2.- Udalak, interes publikoko arrazoiak tarteko, baimenak baliogabetzerik izango du, kalte-ordaina jasotzeko eskubiderik sortu gabe, Administrazio Publikoen Ondareari buruzko 33/2003 Legearen 92.4 artikulua edo ordeztu duen araudiaren ildotik.

3.- Udalak beretzat gordetzen du lursailen antolaketa eta banaketan aldaketak egiteko eskubidea, baita horien azalera aldatzekoa eta, behar izanez gero, lursailak ixtekoa ere. Kasu horietan, udalak alde aurretik eta behar besteko aurrerapenez jakinarazi beharko die erabiltzaileei, ezinbesteko kasuetan izan ezik. Erabiltzaile diren pertsona eta entitateek ez dute inongo kalte-ordainik jasotzeko eskubiderik izango aldaketa horien ondorioz, ez adjudikatutako lursailen azaleraren parte bat galtzen dutelarik, ez lursailak ixten direlarik, ezta bertan landutako produktuen ordainetan ere.

4.- Baratzea erabiltzeko eta, beraz, landatzeko baimenak ez dakar berekin lursailaren gaineko beste eskubiderik.

5.- Erabiltzeko baimena norberak eta ez bestek erabiltzekoa da, eta ezarritako baldintzak betetzen diren bitartean baliatu ahal izango da.

6.- Baimena edozein unetan utzi ahal izango da bertan behera, edo aldatu, arrazoi justifikatuak direla medio, titularrari inongo kalte-ordainik edo bestelakorik ordaindu beharrik gabe.

7.- Baimena bertan behera utzi zaion pertsonak baratzea erabiltzen jarraitzen badu, Gasteizko Udalak bertatik aterarazi ahal izango du, Administrazio Publikoen Ondareari buruzko azaroaren 3ko 33/2003 Legean aitortzen diren ahalmen eta eskumenak baliatuz.

8.- Ordenantza honetan ezarritako arauak onartzea dakar berekin Udalaren hiri-baratzeak adjudikatzeko prozeduran parte hartzeak.

6. artikulua.- Tasa.

Ordenantza fiskaletan finkatuko da Gasteizko hiri-baratzeetako lursailak erabiltzeagatik ordaindu beharko den zerga.

II. titulua.- Pertsona eta entitate onuradunak hautatzeko prozedura.

7. artikulua.- Erabiltzeko baimenak.



1.- Pertsona fisikoei eta nortasun juridikoa duten entitateei emango zaizkie Udalaren hiri-baratzeak erabiltzeko baimenak, ordenantza honen 10. artikuluan zehazten den prozedura baliaturik eta lehia askea ziurtatuz.

Horretarako, erabilgarri dauden lursailen zerrenda finkatuko dute udal-zerbitzu teknikoek.

2.- Nortasun juridikoa duten elkarte eta entitateei ematen zaizkien baimenak lehia askearen erregimena baliatuz emango dira, deialdira aurkezten diren proiektuak balioetsi ondoren.

8. artikulua.- Onuradun izateko betekizunak.

Baratzeak erabiltzeko baimena eskuratzekotan, baldintza hauek bete beharko dira:

1.- Pertsona fisikoen kasuan:

a) Adinduna izatea, eta Gasteizko auzotarra, hots, biztanleen udal-erroldan izena emanda egotea.

b) Baratzeetako lursailak erabiltzeko baimenak emateko deialdian parte hartzea.

c) Udal-baratzea erabiltzeko baimena indarrean jarri aurretik Udalak antolatutako baratze zaintza ekologikoari buruzko arauzko ikastaroa egin izana.

d) Deialdiaren urtearen aurreko bietan udal-lursail bat erabiltzeko baimenik ez eduki izana, ordenantza honen 10.3 artikuluko hirugarren paragrafoan ezarritakoa gorabehera.

e) Udalari ordaindu beharreko zergak ordainduta edukitzea.

2.- Nortasun juridikoa duten elkarte eta entitateen kasuan:

a) Nortasun juridikoa duten elkarte eta entitateei lursailak erabiltzeko baimenak adjudikatzeko deialdian parte hartzea, ordezkari adindun bat izendatuz horretarako.

b) Proiektu bat aurkeztea, non baratzeetan egiteko diren jarduerak garatzen diren, eta beren jarduerak nekazaritza ekologikoarekin edo deialdian bertan zehazten diren bestelako helburuekin zerikusia dutela justifikatzea.

c) Udalari ordaindu beharreko zergak ordainduta edukitzea.

9. artikulua.- Lursailak erabiltzeko baimena eskuratzeko debekuak.



Ezin dute baratzerik erabiltzeko aukerarik izango egoera hauetakoren batean dauden pertsonak:

1.- Pertsona fisikoen kasuan:

- a) Udalaren hiri-baratzeetan beste lursail baten adjudikaziodun izatea.
- b) Udal-lursail bat erabiltzeko baimena baliogabetu izana, azken bost urteetan.

2.- Nortasun juridikoa duten elkarte eta entitateen kasuan:

- a) Udalaren hiri-baratzeetan beste lursail baten adjudikaziodun izatea, udal-teknikariek txostena egin ondoren eta behar bezala justifikaturik organo eskudunak egiten dituen salbuespenak salbu.
- b) Udal-lursail bat erabiltzeko baimena baliogabetu izana, azken bost urteetan, bertako baldintzak ez betetzeagatik.

10. artikulua.- Baimena eskuratzeko prozedura.

1.- Hainbat hedabidetan eta Udalaren webgunean iragarriko den deialdi publikoaren bidez ekingo zaio prozedurari. Deialdian bertan zehaztuko da eskabideak aurkezteko epea, zein ezingo baita izan 15 egun naturaletik beherakoa.

2.- Hiri-baratzeetako lursail bat adjudikatzea nahi duten pertsona eta entitateek Udalaren Erregistro Nagusian edo herritarrei laguntzeko bulegoetakoren batean aurkeztu beharko dute eskabidea, horretarako eskuragarri izango duten eredu normalizatua baliatuz.

Eredu normalizatuan bertan nahiz deialdiaren oinarrietan eskatzen diren agiriak erantsi beharko zaizkio eskabideari.

Eskabideak aurkezteko epea bukatu ondoren, onartu eta baztertuen behin-behineko zerrenda argitaratuko da Udalaren webgunean eta iragarki-taulan, baztertzeko arrazoiak adierazten direlarik.

Ondoren, 15 eguneko epea zabalduko da, erreklamazioak aurkezteko eta agirietako akatsak zuzentzeko.

Erreklamazioak ebazten direlarik, onartutako eskabideen behin betiko zerrenda argitaratuko da. Pertsona fisikoei zuzendutako deialdiaren kasuan, zozketarako zenbakia agertuko da zerrendan, eta hura zein egun eta ordutan izango den adieraziko.

Zozketaren emaitza akta batean jasoko da, eta Udalaren iragarki-taulan eta webgunean argitara emango, kontsultatzerik izan dadin. Zozketa egin ondoren, adjudikaziodunei jakinaraziko zaie Udalaren hiri-baratzeak erabiltzeko baimenaren inguruko ebazpena.



Elkarteek eta pertsona juridikoeak aurkezten dituzten eskabideen balioespenaren emaitza Udalaren iragarki-taulan eta webgunean argitaratuko da, eta erabiltzeko baimenen adjudikaziodun egokitzen direnei jakinaraziko.

3.- Erabiltzeko baimena adjudikatzea:

Zozketa egin ondoren, lursailak erabiltzeko baimena emango zaie pertsona fisiko adjudikaziodunei, aldez aurretik egiaztatzen delarik Udalak antolatutako baratzezaintza ekologikoari buruzko arauzko ikastaroa egin dutela, azken hamar urteetan.

Baldin eta, zozketa egin eta lursailak erabiltzeko baimenak eman ondoren, lursailik geratzen bada erabilgarri, bigarren deialdi bat egin ahal izango du Udalak, lursail horien erabilera baimentzeko, urtebeteko aldirako —gehienez lau urtera arte luzatzeko aukerarekin—. Deialdi horretara aurkezteko, ez da beharrezkoa izango Udalak antolatutako baratzezaintza ekologikoari buruzko arauzko ikastaroa egin izana; bai, ordea, erabiltzeko baimenaren luzapena lortzekotan. Aurreko bi urteetan udal-lursail bat erabili izan duten pertsonak ere aurkeztu ahal izango dute deialdi berri horretara.

4.- Administrazio publikoen ondarearen erregimenari buruzko araudian edo hori ordeztzen duen araudian adierazten direnak jaso beharko ditu baimena emateko erabakiak.

Udalaren hiri-baratze bat erabiltzeko baimena ematen deneko administrazioaren ebazpenak agortu egingo du administrazio-bidea. Organo eskudunaren ebazpenaren kontra aukerako berraztertze errekurtsoa aurkeztu ahal izango da, erabakia hartu duen organo berari zuzenduta, edo, behar izanez gero, administrazioarekiko auzi-errekurtsoa.

11. artikulua.- Baimenen iraunaldia.

Gehienez ere 4 urteko indarraldia izango dute baimenek, eta ezingo da epe hori luzatu.

12. artikulua.- Baimenen iraungipena.

1.- Udalak baratzeak erabiltzeko ematen dituen baimenak iraungi egingo dira honako kasu hauetan:

- a) Epea iraungitzen delarik.
- b) Erabiltzailea hiltzen edo ezintasun egoeran egokitzen delarik, edo nortasun juridikoa agortzen.
- c) Zein ondasunen gainean eman diren, horien galera fisikoa edo juridikoa gertatzen delarik.
- d) Ondasunari atxikidura kentzen zaiolarik.



- e) Bi aldeek hala adosten dutelarik.
 - f) Aldeetako batek bere kasa ezeztatzen duelarik.
 - g) Ebazpen judiziala dela medio.
 - h) Adjudikaziodunak uko egiten diolarik.
 - i) Udalaren hiri-baratze gisa baliatzen diren lursailen gainean edozein hornidura publiko edo pribatu jartzea dakarren hirigintza-garapenerako edo azpiegiturak gauzatzeko edozein plan edo proiektu onesten delarik.
- 2.- Aurreko atalean adierazitako arrazoietakoren bat dela medio baimenak iraungiz gero, administrazio-prozedura izapidetu beharko da, Administrazio Publikoen Administrazio Prozedura Erkidearen urriaren 1eko 39/2015 Legean eta aplikatzekoak diren gainerako arauetan ezarritakoarekin bat etorriz.

III. titulua.- Erabilera- eta gozamen-baldintzak.

13. artikulua.- Baimenen izaera pertsonala.

Baratzeak erabiltzeko baimenak pertsona fisiko titularrei eta nortasun juridikoa duten entitate eta elkarteei emango zaizkie, eta berariaz debekatuta egongo da horiek besteri mailegatzea, uztea, alokatzea edo eskualdatzea. Beti ere, pertsona edo entitate adjudikazioduna izango da lagatako lursailaren erabileraren erantzule bakarra, eta, hortaz, hurrengo artikuluan ezartzen denaren kontrako erabilerak berekin dakartzan ondorioena.

14. artikulua.- Erabilera-arauak.

1.- Udalaren hiri-baratzeak erabiltzeko baimenen adjudikaziodun diren pertsona eta entitateak behartuta egongo dira erabilera-arau hauek betetzera:

- a) Administrazio-baimenean zehazten diren landare-espezieak landatzeko baliatzea baratzeak, halakorik zehazten bada.
- b) Nekazaritza ekologikoaren irizpideak baliatzea, eta, halaber, ura aurrezteari lehentasuna ematen dioten ureztatze-sistemak, eta norberaren haziak edo jatorri ekologikoa duten landare edo haziak. Ongarri organikoak bakarrik erabili ahal izango dira. Baratzean bestelako produkturik erabiltzekotan, hala nola ongarriak eta pestizidak, Euskadiko Nekazaritza eta Elikadura Ekologikoaren Kontseiluak (ENEK) baimendutako produktu fitosanitarioak izan beharko dute, eta aldez aurretik Udalak baimendu beharko ditu.



c) Erabiltzeko uzten diren lursaila, instalazioak, lanabesak eta tresnak behar adinako arretarekin zaintzea. Bereziki, erabiltzaileek harri, egur, landare, hondakin edo lurrik gabe, garbi eduki beharko dituzte beren lursailen mugakide diren korridoreak, baita, halakorik bada, mugakide dituzten landare-ontziak zaindu ere (ureztatu eta jorratu). Era berean, baratzeen mugetako heskaien airetiko parteak kanpoko aldera luza daitezela ekidin beharko dute, eremu komunak, ondoko baratzeak edo bideak ez ditzaten har.

Baratzeen erabiltzaileek nekazaritzarako behar dituzten lanabesak maileguan jasotzen badituzte, behar bezala erabili eta zaindu beharko dituzte, ez hondatzeko. Oker erabiltzearen ondorioz kaltetu edo hondatzen diren ondasun eta tresnak konpondu edo berritu egin beharko dituzte, baita galtzen dituztenak ere.

Lanabesak gordetzeko lekuak garbi eta egoera onean eduki beharko dituzte.

d) Jardueraren arduradunek ematen dizkieten jarraibideak errespetatzea, une oro. Jardueraren arduradunek ematen dizkieten arauak errespetatzea, urasketako uraren, ongarrien, lanabesen eta, oro har, uzten zaien beste edozein elementuren erabilerari dagokionez. Armairutxo irekitzea galdatzen zaielarik, ikuskatzeko, hala egitea.

e) Gizalegezko jokabidea izatea une oro, eta baratzeen eta utzitako tresna eta lanabesen gainerako erabiltzaileekiko begirunea erakustea; haiei enbarazurik ez egitea, eta kalte edo zauririk eragin liezaiekeen tresnarik ez erabiltzea.

f) Jatorriz uzten zaien lursailaren egitura eta azalerari bere horretan eustea, inongo obra edo itxiturarik egin gabe, salbu eta eskumena duen udal-organoak alde zuzenetik horretarako baimena ematen badie.

g) Jardueraren arduradun diren teknikariei jakinaraztea baratzeei, bertako instalazioei nahiz utzitako materialari eragiten dien gertakari, lapurreta, arazo, kalte edo hondamen oro, beste erabiltzailearen batek nahiz kanpoko norbaitek eraginak izan.

h) Lursaila garbi eta hutsik uztea hura erabiltzeko baimena bukatzean. Jaso zituztenekoaren antzeko egoeran itzuli beharko dituzte baratzeak adjudikaziodunek. Aurreikusitako erabileraren ondorioz normala den baino hondamen handiagorik gertatuz gero instalazioetan, pertsona eta entitate erabiltzaileek jatorrizko egoerara bihurtu beharko dituzte gauzak, edo berritu, eta, baten batek betebehara hori betetzen ez badu, Udalak egin ahal izango du zuzenean, eta, gerora, administrazioak halakoetarako duen ahalmena baliatu, hari ordainarazteko.

i) Erabiltzen bukatzean lanabesak itzultzea. Maileguan jasotako lanabesak eta gainerako tresnak garbi eta egoera onean itzuli beharko dira, eta zer edo zer hondatu bada, jakinarazi.



j) Baratzeetan materialak edo lanabesak ez utzi edo pilatzea, salbu eta lurra lantzeko ezinbesteko direnak.

k) Ureztapena baratzeen instalazioetan erabiltzaileen eskura jartzen diren bitartekoak baliatuz egitea. Ezingo da erabili bertan dauden edo eskura jartzen direnez bestelako elementurik horretarako, salbu eta baratzeen arduradunek baimentzen dutelarik. Bereziki, debekatuta egongo da ihinztigailuak edo aldameneko baratzeak inbadi ditzaketen bestelako bitartekoak erabiliz ureztatzea. Ureztatzeko ura alferrik galtzea ekidin beharko da, eta dagoen ura neurritz kanpo kontsumitzea dakarten ureztatze-metodoak erabiltzea. Era berean, debekatuta egongo da ura beste edonondik ekartzea, ezpada horretarako egokitutako lekutik. Aisialdiko baratzeen erabiltzaile diren pertsona eta entitateek ura erabiltzeagatik ordaindu beharreko tasa edo kanon bat ezarri ahal izango du Udalak, hornidura-kostuak aintzat harturik. Lehorre-garaietan, ura kontsumitzeko mugak ezarri ahalko ditu udalak.

l) Baratzeetan animaliarik edukiz gero, Animaliak Eduki eta Babesteari buruzko Udal Ordenantzan —edo hori ordeztzen duen araudian— aurreikusitako baldintzak betetzea.

m) Baratzeen barru aldera trakzio mekanikoko ibilgailuekin ez sartzea, ezpada laborantza-lanetarako beharrezko direnekin.

n) Baratzeak landu edo erabiltzeari ez uztea. Adjudikaziodun den pertsona edo entitatea behartuta egongo da baratzea lantzearen inguruko jarduerak oro garaiz egitera, eta hura erabiltzeko eskubidea galdu egingo du baldin eta arrazoi justifikaturik gabe bertan behar utzi duela atzematen bada. Aldi batez baratzea lantzeko ezintasuna egokitzen zaiolarik, erabiltzaileak jardueraren arduradunei jakinarazi beharko die, hamar egun baliaduneko epean jakinarazi ere, horren berri duenetik. Baratze bat bertan behera utzita dagoela joko da bertan landatuak zaindu gabe daudela nabarmena gertatzen delarik, baita basalandareek hartua badago ere, edo bertako izurri eta bizkarroien ugaritasunak aldameneko lursailetakoa landareei kalte egiteko arriskua badago. Baratze bat bertan behera utzia badago, erabiltzaileak —ohartarazten zaiolarik— hamabost egun naturaleko epea izango du hura egokitzeko. Hala egin ezean, soildu egingo da baratzea, eta erabiltzaileak ez du inongo kalte-ordainik jasotzeko eskubiderik izango.

o) Pertsona fisikoen kasuan, lursailaren erabilerari dagozkion zereginak norberak egitea, Udalaren aurrean behar bezala egiaztatutako kasuak salbu. Nolanahi ere, lizentziaren titularrak beste pertsona batzuen laguntza jaso ahal izango du baratzea landu eta zaintzeko orduan, aldez aurretik baratzeen arduradunei ahoz jakinarazten diolarik; baina galarazita egongo da, beti ere, beste inor subrogatzea adjudikaziodunaren lekuan.

p) Beste entitate batzuekiko lankidetzaproiektuetan parte hartzea, Udalak —baratze ekologikoen kudeaketaren arduraduna den aldetik— programatzen dituelarik.



q) Baratzeetan sortzen den materia organikoa konpostatzeko bide emango da. Horretarako, zuzenean baratze bakoitzean konpostatzeko obligazioa ezartzen da, edo hainbat baratzeri zerbitzu ematen dieten konpostatzeko lekuetan.

2.- Baimenaren titular den pertsona edo entitateak erabilera-arau horietako edozein urratzen badu, Udalak bertan behera utzi ahal izango du hura, Administrazio Publikoen Administrazio Prozedura Erkidearen urriaren 1eko 39/2015 Legearen ildotik administrazio-prozedura izapidetu ondoren.

15. artikulua.- Debekuak.

1.- Udalaren hiri-baratzeak baratze ekologiko gisa baino ezingo dira baliatu, edo pedagogia-, terapia-, ingurumen-, gizarte- edo zientzia- eta teknika-xedeekin lotura duten nortasun juridikoko elkarte eta entitateen jarduera-programetarako, eta norberaren edo senitartekoen kontsumorako espezieak baino ezingo dira landatu, ezpada lorategiko landareak.

Horrenbestez, ezingo dira beste edozertarako baliatu. Berriaz debekatuta egongo da:

a) Baratzeko produktuak merkaturatzea —baratzeen erabiltzaileen arteko trukea baino ez da egongo baimenduta—.

b) Lurra hondatzen duten landareak eta landare psikotropikoak nahiz legeek debekatuak landatzea, eta hazi transgenikoak erabiltzea.

c) Nekazaritza ekologikoaren alorrean indarrean dagoen legediak baimentzen ez dituen herbizidak, pestizidak eta ongari kimikoak erabiltzea.

d) Fauna bereizketarik gabe harrapatzeko tranpa edo metodoak erabiltzea, baita horretarako jakiak jartzea ere, gai pozoitsuak eduki ala ez.

e) Edonolako bereizgailu edo mugaketarik jartzea —kanaberak, egurrak, hesiak, plastikoak—; ohol finkorik edo bankurik jartzea; txorimaloak, barbakoak, txabolak, estalpeak, oilategiak nahiz edozein animalia hazi edo edukitzeko kaiolak edo edonolako eraikuntzak egin edo instalatzea, dela material artifizialekin, dela naturalekin —parrak—; elementu berriak eraiki edo instalatzea edo lehendik zeudenak aldatzea, salbu eta Udalak horretarako baimena berriaz ematen badu. Baimen hori idatziz eskatu beharko da, eta bide bera baliatuz erantzungo zaio eskatzaileari.

f) Zuhaitzak eta zuhaixkak landatzea, fruitu espeziekin zerikusia duten proiektuetarako lursailetan izan ezik.

g) Baratzea materialak eta altzariak —mahaiak, aulkiak— eduki edo gordetzeko erabiltzea.



- h) Ehiza egitea, zuhaitzak ebakitzea nahiz baratzean edo inguruan izan litekeen fauna eta florari kalte egin diezaiokeen beste edozein jarduera.
- i) Baratzeke zereginekin zerikusirik ez duen materiala pilatu edo botatzea bertan, eta hartara lekua itxuragabetzea.
- j) Baratzean sortutako hondakinak erretzea edo sua egitea.
- k) Baratzean sortutako hondakinak nahiz soiltze- eta garbitze-lanetako hondakinak beste baratze edo orubeetan uztea, eta sortutako hondakinak behar bezala ez bereiztea, birziklatzeko.
- l) Ura alferrik galdu edo xahutzea. Galarazita dago hodi malguak erabiltzea, lursaila ureztatzeko nahiz ordezeko ureztatze-sistemak hornitzeko.
- m) Ibilgailu motordunekin zirkulatzea esparruaren barrutik, lanabes motordunak erabiltzeko aukera gorabehera.
- n) Baratzeen esparruan ibilgailu pribatuak sartzea edo aparkatzea.
- o) Baratzea kudeatzearen ardura duten langileek finkatutako edo baimendutakoez bestelako lanabesik erabiltzea.
- p) Adjudikatutako lursailetik kanpo besterik landu edo okupatzea.
- q) Baratzeke lanetan jardun bitartean lanabesak lursailaren mugetatik kanpo uztea.
- r) Norberaren objektu eta arropak tresna eta lanabesak uzteko lekuetan gordetzea.
- s) Aurrekoez gaineko beste edozein jarduera, baldin eta eragozpenak edo usain txarrak sortzen baditu, gainerako erabiltzaileen erabilera mugatzen badu edo inguruneari eragiten badio.

2.- Baimenaren titular den pertsona edo entitateak debeku horietako edozein hautsiz gero, Udalak bertan behera utzi ahal izango du hura, administrazio-prozedura izapidetu ondoren.

16. artikulua.- Ordutegiak.

Ordutegi jakin bat izango da esparrua irekitzeko —baratzeen erabiltzaile diren pertsona eta entitateak horren jakinaren gainean jarriko dira—.

1.- Horretarako ezarritako ordutegiaren barruan gauzatu beharko da baimenen onuradun diren entitateei dagokien erabilera.



2.- Nolanahi ere, baimenak edo eskumena duen organoak gerora emandako edozein egintzak finkatutako ordutegia aldatzerik izango du, dena delako arrazoiak direla medio.

17. artikulua.- Hondakinen kudeaketa.

1.- Baratzeen erabiltzaile diren pertsona eta entitateak izango dira beren lursailetan sortzen diren hondakinak egoki tratatzearen erantzule.

Jarduera horren barruan sortzen diren hondakin konpostagarri, organiko, biodegradagarriak konpostatze-prozesura bildu beharko dira, lursailean bertan.

Baratzeko gainerako hondakinak, hala nola plastikoak, zurezko nahiz plastikozko ontziak, hodi malguak, makilak eta sokak, baimenaren titular den pertsonak kudeatu beharko ditu, Garbiketari eta hondakinen bilketa eta garraioari buruzko ordenantzan ezarritako irizpideak aintzat hartuta.

18. artikulua.- Erabiltzaile-izaera galtzea.

1.- Udalaren hiri-baratzeen erabiltzaile diren pertsona eta entitateek izaera hori galtzerik izango dute erabilera-arauak betetzen ez badituzte edo ordenantza honetan jasotzen diren debekuak errespetatzen ez badituzte, edo interes publikoko edozein arrazoiengatik.

2.- Horrez gain, egintza edo zirkunstantzia hauek ere ekarriko dute baratzea erabiltzeko eskubidea galtzea:

a) Baimenak iraungitzeko arrazoietakako edozeinek —ordenantza honetan bertan jasoak—

b) Udalari ordaindu beharreko zergak ordainduta ez edukitzeak.

c) Lursaila erabili edo lantzeari utzi —hiru hilabetetik gorako aldi batez— edo baimena emateko orduan balioetsitako programa ez betetzeak, behar bezala justifikatutako ezinbesteko kasuan izan ezik.

d) Ordenantza honetan zehazten diren bateraezintasun edo debekuetako edozein egokitzeak.

3.- Pertsona edo entitate erabiltzailearen izaera galtzeak ez du ekarriko berekin, inolaz ere, kalte-ordainik onartzerik.

4.- Udala bada lursaila erabili edo baliatzeko eskubidea galdutzat jotzen duena, behar den administrazio-prozedura izapidetu beharko du alde aurretik, eta entzunaldia eskaini interesdunari.



IV. titulua.- Erantzukizun-erregimena.

19. artikulua.- Erantzukizun-erregimena.

1.- Erabiltzaile diren pertsona edo entitateak izango dira lursailak erabili eta baliatu bitartean beren buruari edo besteri eragiten dizkieten kalteen erantzule, halakorik izanez gero. Nolanahi ere, Udala ez da izango erabiltzaileek elkarri edo besteri eragiten dizkieten kalteen erantzule, halakorik izanez gero.

Lursailak erabiltzeko baimenak emateko deialdian eskabidea aurkezteak berekin ekarriko du dena delako pertsona edo entitateak jarduerak dakartzan arriskuak bere gain hartzea, eta Udalak ez du erantzukizunik izango kalte materialik gertatuz gero, edo erabiltzaileek nahiz horien laguntzaileek —erorketa, istripu, kolpe edo antzekoen ondorioz— kalte pertsonalik jasanez gero.

2.- Baimenaren titularrak bere arrisku eta menturara erabiliko du lursaila. Udala ez da izango fenomeno meteorologikoak direla eta —kazkabarra, uholdeak...— baratzeetan sortzen diren kalteen erantzule.

3.- Udalak ez du erantzukizunik bere gain hartuko baratzeetan gertatzen diren kalte, lapurreta eta ekintza bandalikoak direla eta. Eta ez du izango horiek zaintzeko ardurarik ere.

4.- Udalak ofizioz ekin ahal izango dio baratzeen adjudikaziodunek erru edo arduragabekeria larrien ondorioz izan litzaketen erantzukizunak argitzeko prozedurari.

20. artikulua.- Kalteak eta galerak ordaintzea.

1.- Aurreko artikuluan ezarritakoaren ildotik erantzule egokitzen diren pertsona edo entitate erabiltzaileak behartuta egongo dira sortutako kalte edo zauriek eragin dieten pertsonen kalte-ordainak ordaintzera.

2.- Erabiltzeko uzten diren instalazioetako kalteengatik sortzen bada erantzukizuna, kalte-ordaina erreklamatzeko eskubidea Udalak baliatuko du, aplikatzekoak diren administrazio-zuzenbideko arauak aintzat harturik.

3.- Kalte edo zauriak partikularrei eragiten bazaizkie, hau da, gainerako erabiltzaileei, haiek galdatuko dute erantzukizuna, legedia zibilean ezarritakoaren ildotik.

V. titulua.- Udalaren hiri-baratzeen antolaketa.

21. artikulua.- Baratzeen kudeaketari atxikitako organoak eta langileak.



1.- Aurreko tituluan adierazitakoaren arabera baratzeen erabiltzaile diren pertsona eta entitateei dagozkien erantzukizunak gorabehera, haien kudeaketaren jarraipena egingo du Udalak, haiek egiten dituzten lanak ordenantza honetan eta aplikatu beharreko gainerako araudietan ezarritakoarekin bat datozela egiaztatze aldera.

2.- Teknikari gaituak izendatuko ditu eskumena duen organo lokalak jarraipen-zereginak egin ditzaten, baratzei dagokienez.

Langile horiek kontrol-ahalmenak izango dituzte, informazioa jaso eta ikuskatzerik izango dute, eta, gainera, jarraibide zehatzak eman ahal izango dizkiete erabiltzaile diren pertsona eta entitateei, baratzeen funtzionamendu egokiaren inguruan, eta, beraz, horiek erabiltzeko baimenak emanaz lortu nahi diren helburuak lortzeari dagozkionetan.

22. artikulua.- Jarraipen-batzorde teknikoa.

1.- Batzorde tekniko bat sortu ahal izango du Udalak, Udalaren hiri-baratzeen funtzionamenduaren jarraipena egiteko, zeinen jarduna Sektore Publikoaren Araubide Juridikoaren urriaren 1eko 40/2015 Legean organo kolegiatuentzat aurreikusitako erregimenak arautuko baitu, eta kide hauek izango baititu:

a) Ingurumeneko zinegotzi arduraduna, zeinek lehendakari gisa jardungo baitu, edo hark ordezkari izendatzen duena.

b) Udal-teknikari bat.

c) Udalaren hiri-baratzeen erabiltzaile diren pertsona edo entitateen ordezkari bat.

d) Lehendakariak hala baimentzen duelarik, teknikari adituak ere bertaratu ahal izango dira inoiz —ahotsa izango dute, baina ezingo dute botorik eman—, beren ezagutza eta esperientzia dela eta.

2.- Hiru hilean behin bilduko da batzordea, ohiko bilkuran, eta aparteko bilkuran, berriz, noiznahi, dela lehendakariaren ekimenez, dela kideen heren batek hala eskatuta.

3.- Hauek izango dira batzorde teknikoaren zereginak:

a) Programaren funtzionamenduaren jarraipena egitea.

b) Erabiltzaile diren pertsona eta entitateen iradokizunak jasotzea eta hobetzeko proposamenak egitea.

c) Baratzeen erabileraren inguruko liskar eta gorabeheren berri ematea.

d) Praktika onei buruzko agiriak eta gidak onestea, baratzeak erabili eta lantzeari dagozkionetan.



e) Lursailen kudeaketa hobetzeko planak onestea, baita ekologiaren, ingurumenaren eta heziketaren ikuspegitik haien errendimendua hobetzea helburu duten gomendioak ere.

23. artikulua.- Teknikariak.

Behar diren teknikariak atxiki beharko dizkio Udalak baratzeen kudeaketa eta kontrolaren jarraipenari, zeinek ezagutza egokiak izan beharko baitituzte Udalaren hiri-baratzeen programa behar bezala garatzen dela bermatze aldera.

24. artikulua.- Erabiltzaile diren pertsona eta entitateekiko komunikazioak.

1.- Baratzeen ohiko funtzionamenduaren inguruko kontuei buruzko jakinarazpenak — materialen banaketa, ordutegi-aldaketak, tutoretza-ordutegia eta antzekoak— Udalaren hiri-baratzeetako iragarki-tauletan eta ohiko lekuetan argitaratuz gauzatuko dira.

Horren osagarri, bitarteko telematikoen bidez egingo dira jakinarazpenak.

2.- Interesdunei jakinarazpen ofizialak helarazteko, Administrazio Publikoen Administrazio Prozedura Erkidearen urriaren 1eko 39/2015 Legean xedatutakoaren arabera jokatu da.

VI. titulua.- Zigortzeko erregimena

25. artikulua.- Ikuskapena eta kontrola.

1.- Udalak izendatzen dituen teknikariek egingo dituzte ikuskapen- eta kontrol-lanak; hain zuzen ere, ordenantza honetan arautzen diren gaien inguruko zaintza-, ikuskapen- eta kontrol-jarduerak burutu ahalko dituzte.

2.- Teknikariez gain, udaltzainek ere egin ahal izango dituzte ikuskatze-lanak, eta baratzeetara agertu, baldin eta eztabaida eta liskarrak sortzen badira haien kudeaketan, dela erabiltzaileen artean, dela beste inorekin.

3.- Baratzeen erabiltzaile diren pertsona eta entitateak behartuta egongo dira pertsona horiei bertara sartzten uztera, baita eskatzen dizkieten argibideak ematera ere, baratzeen kudeaketari, erabilerari eta ustiapenari jarraipena egiterik izan dezaten hartara.

26. artikulua.- Legezkoatasuna babestea.



Neurri hauek hartu ahal izango dira ordenantzan xedatutakoaren kontrako ekintzak edo ez egiteak egokituz gero, bakoitzerako aurreikusita dagoen prozedurari jarraiki:

- a.- Hondatutakoa berritu edo lehengo egoerara bihurtzeko obligazioa, baita kalte-galerak ordaintzekoa ere.
- b.- Kautela-neurriak hartzea, aplikatzekoa den araudian ezarritakoari jarraiki.
- c.- Administrazio-aginduen betearazpen subsidiarioa.
- d.- Zigorrak jartzea.

27. artikulua.- Arau-haustek eta zigorrak.

1.- Ordenantza honetan halakotzat tipifikatutako ekintzak eta ez egiteak administrazio arau-haustetzat joko dira, Toki Araubidearen Oinarriak arautzen dituen apirilaren 2ko 7/1985 Legearen XI. tituluan xedatutakoaren ildotik.

2.- Ordenantza honetan aurreikusten den zigortzeko ahalmenaz baliatzekotan, lehenik eta behin prozedura zigortzailea abiarazi eta izapidetu beharko da, titulu honetan eta Euskal Autonomia Erkidegoko Herri Administrazioen Zigortzeko Ahalmenari buruzko otsailaren 20ko 2/1998 Legean edo hori ordeztzen duen araudian xedatutakoaren ildotik.

3.- Egileak baino ez dira izango arau-hausteen erantzule, halakotzat joko baitira Euskal Autonomia Erkidegoko Herri Administrazioen Zigortzeko Ahalmenari buruzko otsailaren 20ko 2/1998 Legearen 9. artikuluan edo hori ordeztzen duen araudian zehazten diren ezaugarriak betetzen dituztenak.

28. artikulua. Arau-haustek.

Hauek joko dira Toki Araubidearen Oinarriak arautzen dituen apirilaren 2ko 7/1985 Legearen XI. tituluaren babesean tipifikatutako arau-haustetzat:

1.- Arau-hauste arinak:

- a) Baratzeen erabiltzaileei nahiz bertan zereginen bat burutzen duten teknikari edo langileei tratu ezegokia edo txarra ematea.
- b) Ausarkeria edo axolagabekeria dela medio kalteak sortzea bertako instalazio, material edo ekipamenduetan, 100 eurotik beherako baliokoak.
- c) Jarduera edo zerbitzuen arduradunek beren zereginen esparruan emandako aginduei jaramonik ez egitea.



- d) Lursaila onik zaintzeko oinarrizko zereginak ez egitea.
- e) Ez konpostatzea, ordenantzan aurreikusten den moduetakoren batean.
- f) Baratzeetako elkarbizitza eta funtzionamendua nahastea, besteri eragozpenak eraginez.
- g) Espezie debekatuak landatzea, edo baratzeak hondatzea dakartenak.
- h) Baratzea erabiltzeko baimena eskuratzeko ezarritako betebeharrak betetzeari eragin diezaioketen aldaketen berri ez ematea.
- i) Hondakin organikoak plastiko eta metalen edukiontzietan uztea.
- j) 14. artikuluan xedatutakoa urratzea, baldin eta larrizat edo oso larrizat jotzerik ez badago.
- k) Ordenantza honetan finkatutako betebeharretakoren bat ez betetzea, arau-hauste larri edo oso larrizat jotzerik ez badago.

2.- Arau-hauste larriak:

- a) Baratzeen erabiltzaileei eta bertako langileei tratu txarra ematea, hitzez nahiz egitez.
- b) Dela nahita, dela ausarkeria edo axolagabekeria dela medio, kalteak sortzea bertako instalazio, material edo ekipamenduetan, 100 eurotik 300era bitarteko baliokoak.
- c) Lursaillean obrak edo aldaketak egitea, aldeztaraz Udalaren baimena izan gabe.
- d) Baratzeetan barbakoak, estalpeak edo baimenduta ez dauden bestelako elementuak instalatzea.
- e) Lursailetan sua egitea, edozertarako delarik ere.
- f) Lau urteko epean bi arau-hauste arin edo gehiago errepikatzea arau-hauste larrizat joko da.

3.- Arau-hauste oso larriak:

- a) Lurra kutsatzea.
- b) 400 eurotik gorako balioa duten udal-ondasunak lapurtzea.
- c) Dela nahita, dela ausarkeria edo axolagabekeria dela medio, kalteak sortzea bertako instalazio, material edo ekipamenduetan, 301 eurotik gorako baliokoak.



- d) Debekatuta dauden landare toxikoak ekoiztea.
- e) Baratzeetan landutako produktuak merkaturatzea.
- f) Horretarako eskubidea duen beste inori baratzeak erabiltzea galaraztea.
- g) Baratzeen funtzionamendu normala galarazi edo eragozte.
- h) Baratzeak erabiltzen ari diren pertsoneri nahiz bertako langileei fisikoki eraso egitea.
- i) Erabiltzeko baimena lortzeko eman beharreko datuak —nortasuna, adina edo beste— faltsutzea, edo beste inoren nortasuna bereganatzea.
- j) Baratzea erabiltzeko baimena bertan behera uzten delarik, Udalak emandako epean ez hustea lursaila.
- k) Baimena beste pertsona edo entitatearen bati eskualdatu edo ematea.
- l) Lurra kutsatzea, ongarri kimikoak edo plagizidak erabiliz.

29. artikulua.- Zigorrak.

1.- Isun hauekin zigortuko dira aurreko artikuluan tipifikatutako arau-haustek:

- a) Arau-hauste oso larriak: 3.000 euro arteko isuna.
- b) Arau-hauste arinak: 1.500 euro arteko isuna.
- c) Arau-hauste arinak: 750 euro arteko isuna.

2.- Arau-haustek mailakatu eta isunen zenbatekoa zehazteko, irizpide hauek hartuko dira aintzat:

- a) Erruduntasun-maila, edo nahita egin den.
- b) Jokabide arau-hauslearen jarraitutasuna edo iraunkortasuna.
- c) Eragindako kalteen izaera.
- d) Berrerori izana, urtebetean izaera bereko arau-hauste bat baino gehiago eginez, administrazio-bidean irmoa den ebazpen baten bitartez hala deklaratu bada.

30. artikulua.- Zigortzeko eskumena.



Tokiko Gobernu Batzarra izango da organo eskuduna ordenantza honetan finkatutako zigorrak ezartzeko, eskumen hori besteri eskuordetzeko ahalmena gorabehera.

31. artikulua.- Prozedura zigortzailea.

1.- Titulu honetan zehaztutako arau-hausteak zigortzeko prozedura bat etorriko da Administrazio Publikoen Administrazio Prozedura Erkidearen urriaren 1eko 39/2015 Legean eta Euskal Autonomia Erkidegoko Administrazio Publikoen Zigortzeko Ahalmenari buruzko otsailaren 20ko 2/1998 Legean edo ordeztan duen araudian xedatutakoarekin.

2.- Zigortzeko ahalmenaren printzipioei dagokienez, Sektore Publikoaren Araubide Juridikoaren urriaren 1eko 40/2015 Legea aplikatuko da.

32. artikulua.- Kautela-neurriak.

Zigortzeko ahalmena baliatzeko eskumena duen organoak kautela-neurriak hartu ahal izango ditu, Euskal Autonomia Erkidegoko Herri Administrazioen Zigortzeko Ahalmenari buruzko otsailaren 20ko 2/1998 Legearen edo ordeztan duen araudiaren ildotik.

33. artikulua.- Lehengoan uzteko eta konpontzeko obligazioa.

Zigorra ezartzeaz gain, arau-hausleari berak eraldatutako egoera lehengoan uzteko eskatu ahal izango zaio, baita, halakorik izanez gero, sortutako kalte-galerak ordaintzeko ere.

Udal-jabetzako ondasunei kalterik eginez gero, udal-zerbitzu teknikoek konponketaren zenbatekoa zehaztuko dute, eta arau-hausleari edo haren ordeztan erantzun behar duenari jakinaraziko, finkatzen den epean ordain dezan.

34. artikulua.- Bateratasuna auzibide penalarekin.

Prozeduraren edozein unetan instrukzio-egileak uste badu bideratzen ari den egintza lege-hauste penaltzat har daitekeela, Euskal Administrazio Publikoen Zigortzeko Ahalmenari buruzko otsailaren 20ko 2/1998 Legearen 25. artikuluan edo ordeztan duen araudian xedatutakoa aplikatuko du.

XEDAPEN GEHIGARRIA

Ordenantza honen xedetik kanpo geratzen da gizarte-ekintza eta -ongizatea helburu duten eta onura publikoaren aitortzea duten entitateentzako erabilera-lagapenen erregimen juridikoa arautzea.



XEDAPEN IRAGANKORRA

Ordenantza hau indarrean jarri aurretik adjudikatutako Udalaren hiri-baratzeak, baita baimena emateko hasitako prozedurak ere, aurreko ordenantzaren mende egongo dira, ondorioei, arauak betetzeari eta iraungitzeari dagokienez, iraupena barne.

AZKEN XEDAPENA

Arabako Lurralde Historikoaren Aldizkari Ofizialean (ALHAO) argitaratu eta Toki Araubidearen Oinarriak arautzen dituen apirilaren 18ko 7/1985 Legearen 65.2 artikuluan aurreikusitako epea igarotzen delarik jarriko da indarrean ordenantza hau.